

inæqualia, atro-holosericea, utrinque valde declivia, margine exteriori suturaque late alba, præterea vittis latis ad marginem interiorem binis, basi conjunctis, in singulo elytro; vitta interiori abbreviata, angustiore, sub-sinuata, pone medium evanescente, exteriori a basi usque apicem protensa. Corpus subtus atrum, pube cinerea densissima et valde depressa vestitum. Pedes longiusculi, robusti, nigri, pube flavo-cinerea dense obducti; tarsis elongatis, subtus dense fulvo-spongiosis.

496. SAPERDA *mirabilis* MIHI. Tab. IX. f. 4.

*Maxima, cylindrica, parallela, tota nigra; antennis crassis; thorace creberrime rugoso-punctato, dense fusco-villoso; elytris cribellatis, setulis flavis condensatis fasciculatim remote adspersis.*

Longit.  $15\frac{1}{2}$  lin. Lat. 5 lin.

Saperdarum quantum mihi innotuit maxima; Saperdæ Carcharitis Fab. quodammodo statura.

Caput productum, sub-deflexum, nigrum, nitidum, crebre rude eroso-punctatum, inæqualiter fusco-villosum, canalicula concinna in medio disci a basi usque ad apicem instructum, vertice convexum, fronte late sed haud profunde excavata, juxta marginem anticum linea transversa sat profunde impressum; ore dense fusco-piloso. Oculi parvi, non prominuli, atrii. Antennæ corporis medio parum longiores, basi valde incrassatæ, totæ nigræ, dense pubescentes, nonnihil nitidæ, tenuissime punctulatæ, apice sub-infuscatæ. Thorax latitudine brevior, niger, sub-nitidus, basi apiceque truncatus, lateribus in medio productus seu gibbus, supra convexus, inæqualis, ubique creberrime rugoso-punctatus, sat dense fusco-villosus,

intra apicem late, sed minus profunde, at juxta basin transversim, anguste nec non profunde impressus, in medio disci utrinque nodulo signatus, præterea intra basin utrinque carinula obliqua angusta et altera latiore nec non obsoletiore et magis nitida pone medium instructus. Scutellum latiusculum, subtriangulare, apice obtusum, disco impressum, pilis fuscis prostratis densissime obductum, nigrum; margine laterali nudo, nitido. Elytra basi thoracis dimidio latiora, basi late sed haud profunde emarginata, humeris productis, rotundatis; lateribus parallela, carinato-marginata, postice parum angustata, apice concinne dehiscentia, singulatim acute rotundata, supra convexa, intra humerum longitudinaliter parum profunde impressa, latera versus præcipue postice cylindrica, undique æqualiter confertim cribellata, nigra, sub-nitida, pilis brevibus flavis condensatis fasciculatim dispersis variegata, præterea pilis rigidis fuscis longis parce obsita. Corpus subtus cylindricum, minute punctatum, nigrum, sub-nitidum, thorace subtus pectoreque dense fusco-villosum; abdomine pube grisea erecta et pilis longis rigidis fuscis vage immixtis parce vestitum; ano emarginato. Pedes longiusculi, validi, nigri, punctati, sub-nitidi, sat dense pilosi.

497. *SAPERDA Scovitzii* MIHI. Tab. IX. f. 5.

*Picea*; fronte, thorace, corpore subtus elytrorumque margine laterali antico densissime flavo-villosis; elytris valde attenuatis, scrobiculatis, sub-nitidis, vittis tribus albidis sub-interruptis in singulo decoratis.

Longit. 8—13 lin. Lat.  $2\frac{1}{6}$ — $4\frac{5}{8}$  lin.

Statura omnino *Saperdæ* *Carcharitis* Fabr. elytris tamen magis attenuatis etc.